

**1. januar 2011 aallarnerfigalugu naartuersittarnerup akileeqataaffigineqartalernissaa-
nik Naalakkersuisut sulissuteqaqqullugit Inatsisartut aalajangiiffigisassaattut
siunnersuut**

(Inatsisartunut ilaasortaq Malik Berthelsen, Siumut)

Akissuteqaat

(Peqqissutsimut Naalakkersuisoq, Agathe Fontain)

Siullermeerneqarnera

Naartuersittarnerup akileeqataaffigineqartalerneratigut innuttaasut siornangiisinnaaneruler-
nissaannik, imminnut paarinerulernissaannik, akisussaassuseqarnerulernissaannik
isumannaannerusumillu atoqateqartarnissaminnik eqqarsarnerulernissaannik isummersorneq
siunnersuummut tunngavilersuutigineqarpoq.

Naalakkersuisunit siunnersuummut qujavugut, naartuersittulli akiliuteqartalernerisigut
kissaatigineqanngitsumik naartulersarnerit pinaveersaartinneqalersinnaanerisa
eqqortuusinnaanera tunngaviatigut isumaqatigisinnaanagu. Ilutigitillugu pingaartipparput
iliuuseqartoqassappat tunngaviussasoq kissaatigineqanngitsumik naartulersarnermut angutip
arnallu ataatsimoorlutik akisussaassuseqarnissaat.

Arnat naartuersittartut qanoq ittuunerinik misissuinerit takutippaat inuuniarnermi pissutsit
naartuersissinnaanerullu akornanni sakkortuumik ataqatigiittoqartoq.

Tassami ilisimaneqarpoq:

- Naartuersinniartut amerlasuut kisimiittuusut
- Naartuersinniartut sivikitsumik ilinniagaqarsimasartut ilinniagaqarsimasaratilluunniit
- Naartuersinniartut amerlasuut inuussutissarsiateqartuunngitsut
- Naartuersinniartut amerlaqisut ilinniartuusut
- Inooqateqarnermik, aningaasaqarnermik ineqarnermillu ajornartorsiutit arnap naartu-
nerminik kipititsiniarluni naartuersinnissaminik aalajangertarneranut
pingaarutilerujussuusartut.

Peqqinnissaqarfimmik atuisut akiliuteqartarnerannik ilisimatusarluni misissuinerup takutippaa
atuisut akiliuteqartarnerat peqqinnissaqarfiup sullissinerinut assigiinngitsumik
atuilersitsisartoq. Tamanna siunertamut naleqqutinngilaq, sullinneqarsinnaanernut
inuuniarnikkut atukkanik pissuteqartumik assigiinngisitsinermik annertusisitsisarami,
akiliisinnaanngitsut inuuniarnikkut ajornartorsiutaannik annertusisitsisarluni,

ungasinnerusorlu eqqarsaatigalugu inuiaqatigiit isumaginninnermut aningaasartuutaannik annertusisitsisarluni.

Ernummatigineqarsinnaavoq naartuersinnermut atuisut akileeqaataasalernerisigut ilinniartuorsimasut aningaasarissaartullu aamma ilinniagaqanngitsut, inuussutissarsiuteqanngitsut aningaasarliornerminnik, inooqatiminnik ajornartorsiuteqarnerminnik imaluunniit ilinniagaqarnermik ingerlataqarnerminnik pissuteqartumik naartuersittariaqartartut akornanni inuuniarnikkut assigiinngissutit annertusitinneqarsinnaanerat.

Naalakkersuisut suleqataaffigerusuppaat kissaatiginngisamik naartulersarnerit sapinngisamik killilersimaarneqarnissaat, isumaqaratilli siunnersuutigineqartoq kissaatigineqartutut sunniuteqarumaartoq.

Inuit ilaasa aalajangersimasut, suaassutsit aalajangersimasut imaluunniit peqqinnissaqarfiup sullissinerinut innuttaasut naligiinnginnerulernissaannut allatut pissutaasinnaasut annertusarneqarnissaat peqataaffigissallugu Naalakkersuisut kissaatiginngilaat.

Pingaaruteqarpoq peqqinnissaqarfiup sullissinerisa aallaaviatigut inatsisit atuuttut aamma pissutsit/nappaatip katsorsarnissaanut periarfissat aallaavigalugit tunngavilersorneqartarnissaat. Tunngavigineqartuassaaq innuttaasut tamarmik peqqinnissaqarfimmit sullinneqarsinnaanerminnut ajornanngippat assigiinnik atugassaqartitaanissaat. Naalakkersuisut isumaqarput taamatut tunngavissitaaneq eqqortuusooq aallaavittullu ingerlaannartariaqartoq.

Assersuutigalugu peqqinnissaqarfiup kikkut tamaasa assigiinnik katsorsartussaavai apequtaatinnagu:

- Pujortartartup utoqqaliarsaalersimasup puammigut kræfteqalersimanera.
- Angutip inuusuttup aalakooreluni angallannermi ajutooreerluni saanerminek napsisimasup katsorsarneqartussaana.
- Arnap kissaatiginngisaminik naartulersimasup naartuersikkusulersimanera.

Atuisunik akiliuteqartitsisarnerup isummertarnermik allanngortitsisinnaanera ilisimatusarnikkut uppersaatissaqartinneqanngilaq. Paarlattuanik uppersarluarneqarsimavoq pinaveersaartitsinikkut pinaveersaartitsiniarlunilu suliniutitigut inuit ataasiakkaat ilisimasaat isummertarnerallu sunnerneqarsinnaasut. Peqqinnerulerusukkaanni peqqinnartunillu toqqaasassagaanni pisariaqarpoq ataasiakkaat taamatut ingerlaaseqarnissamik pigisaqarnissaat aamma peqqinnartunik eqqortunillu toqqaasarnissamut pissusiviusutigut periarfissaqarnissaat. Inuunerittakkut siunnerfiuvoq innuttaasut iliuseqartarnerminni piginnaasaasa pitsaanerulersinneqarnissaat aammattaaq atoqatigiinnermi peqqinnartumik ileqqulersortarnermut tunngatillugu. Peqqinnissaqarfik piffinni arlalinni kissaatigineqanngitsumik naartulersarnernik pinaveersaartitsiniarnermini

periuseqalersimavoq najukkami pissutsit aallaavigalugit ineriartortinneqartumik. Periutsip taassuma nuna tamakkerlugu atuutilersinneqarnissaa pilersaarutaavoq.

Naalakkersuisut kissaatigaat sulissutiginiarlugulu pinaveersaartitsiniarluni peqqinnerulersitsiniarlunilu sulinerup nukittorsartuarneqarnissaa anguniakkanullu Inuuneritta aqqutigalugu akuerisaasunut tunngatillugu ingerlaavartumik ineriartortitsisoqarnissaa, kissaatiguarluguli innuttaasut tamarmik peqqinnissaqarfimmit sullinneqartarnermut tunngatillugu naligiimmik pineqartarnissaat.

Taamaammat siunnersuutip itigartinneqarnissaa Naalakkersuisut inassutigissavaat.